



MIGUEL ÁNGEL DELGADO GONZÁLEZ
R/ Juan Castro Mosquera, 28 – 2º dta
15005 – A CORUÑA

Notifícolle que a Xunta Electoral, nomeada pola Resolución do día 3 de xullo de 2018, da Consellería do Mar, pola que se nomean os membros da Xunta electoral, para a celebración das eleccións para a renovación dos órganos reitores das confrarías de pescadores de Galicia, reuniuse o día 19/10/2018 e acordou o seguinte:

“Procedemento: Eleccións para a renovación dos órganos reitores das confrarías de pescadores de Galicia e das súas federacións.

Persoa interesada: Pladesemapesga

Representante: Miguel Ángel Delgado González

ANTECEDENTES

1. . O día 29.01.2014 o *Diario Oficial de Galicia* publicou o Decreto 8/2014, do 16 de xaneiro, polo que se regulan as confrarías de pescadores de Galicia e as súas federacións.
2. . O día 05.05.2014 o *Diario Oficial de Galicia* publicou a Orde do 29 de abril de 2014, pola que se regulan as eleccións para a renovación dos órganos reitores de confrarías de pescadores de Galicia e das súas federacións.
3. . O día 18.06.2018 o *Diario Oficial de Galicia* publicou o Decreto 64/2018, do 7 de xuño, polo que se modifican o Decreto 8/2014, do 16 de xaneiro, así como a Orde do 29 de abril de 2014, normas antes citadas.





4. . O día 03.07.2018 o *Diario Oficial de Galicia* publicou a Resolución do 19 de xuño de 2018, pola que se convocan eleccións para a renovación dos órganos reitores das confrarías de pescadores de Galicia, incluídas as súas agrupacións sectoriais e das súas federacións.

5. . O día 04.07.2018 constituíuse a Xunta Electoral consonte co disposto no artigo 85 do Decreto 8/2014, do 16 de xaneiro.

6. . O 10.09.2018 publícanse as listas provisionais de candidaturas ás eleccións.

7. . O 19.09.2018 publícanse as listas definitivas de candidaturas ás eleccións.

8. . O 29.09.2018 celébranse as votacións para a renovación dos órganos reitores das confrarías de pescadores de Galicia.

9. . O 01.10.2018 Miguel Ángel Delgado González, en calidade de Presidente da Plataforma en Defensa do Sector Marítimo Pesquero de Galicia presenta un escrito ante a xunta electoral – que foi obxecto de ampliación mediante outro escrito de 02.10.2018- nos que pon de manifesto unha serie de consideracións de diversa índole relacionadas cos procesos electorais das confrarías de pescadores de Galicia e solicita que se declare a nulidade das eleccións celebradas nas confrarías de pescadores de Galicia.

10. . Mediante resolución do 08.10.2018, esta xunta electoral ditou resolución pola que acordou inadmitir o escrito presentado por Miguel Ángel Delgado González por carecer de lexitimación activa na causa.

11. . O 09.10.2018, Miguel Ángel Delgado González presenta recurso de reposición contra a anterior resolución. Dito recurso foi obxecto de aplicación mediante outro escrito presentado en data 16.10.2018.





CONSIDERACIÓNS LEGAIS E TÉCNICAS

1. No recurso interposto apréciase a concorrencia dos requisitos necesarios para a súa admisión a trámite, como personalidade suficiente e lexitimación activa na causa da parte recorrente, así como a interposición en tempo e forma, e a competencia da conselleira do Mar para coñecer do mesmo, segundo o previsto nos artigos 123 e 124 da Lei 39/2015, do 1 de outubro, do procedemento administrativo común das administracións públicas, todo o cal supón a procedencia de entrar no exame das cuestións substantivas que a devandito recurso.

2. A resolución impugnada acordou inadmitir o escrito presentado polo agora recorrente por falta de lexitimación activa, considerando que ao non ser titular de dereito de sufraxio nas eleccións celebradas nas Confrarías de Pescadores de Galicia carece de lexitimación para interpoñer recursos.

3. O recorrente, no seu escrito de recurso reitera algúns motivos de fondo xa expostos inicialmente no escrito que foi inadmitido e volve a solicitar que se suspendan a eleccións nas Confrarías de Pescadores de Galicia. Pola súa parte, no escrito de ampliación do recurso o recorrente fundamentalmente se limita a citar artigos de diversas normas xurídicas que non teñen relación co obxecto do recurso, o cal debe limitarse exclusivamente a inadmisión acordada e non ás cuestións de fondo.

4. Esta xunta electoral confirma na súa integridade a resolución impugnada no senso de considerar axustada a dereito a inadmisión do escrito presentado inicialmente polo recorrente por falta de lexitimación, polo que non procede tampouco neste suposto entrar no fondo do asunto.





Como xa se puxo de manifesto na resolución recorrida, o desenvolvemento dos procesos electorais nas confrarías de pescadores regúlase no Decreto 8/2014, do 16 de xaneiro, polo que se regulan as confrarías de pescadores de Galicia e as súas federacións, no que se contempla o procedemento electoral no capítulo IX. Así mesmo, a Orde de 29 de abril de 2014, pola que se regulan as eleccións para a renovación dos órganos reitores de confrarías de pescadores de Galicia e das súas federacións. Nestas normas establécense distintas fases do procedemento no que se contempla a posibilidade de interpoñer recursos ante os distintos órganos da administración electoral, se ben, ditos recursos unicamente poderán ser interpostos polas persoas interesadas nos devanditos procesos electorais.

O artigo 80 do citado Decreto 8/2014, do 16 de xaneiro, contempla o dereito de sufraxio, cuxos titulares son os membros das confrarías que cumpran os requisitos establecidos na norma. Por outra banda, o artigo 14 indica que entre os dereitos dos membros das confrarías atópase o de exercer accións e formular recursos en relación cos seus dereitos. Así, o recorrente non acredita ser membro de ningunha confraría de pescadores de Galicia, e polo tanto non ostenta ningún dereito ou interese lexítimo que lle habilite para impugnar ningún acto relacionado coas eleccións celebradas nas confrarías de pescadores de Galicia.

Neste sentido pronunciouse a Sentenza n.º 44 do 3 de marzo de 2008 ditada polo Xulgado do Contencioso Administrativo nº1 de Pontevedra, con ocasión dun recurso relacionado coas eleccións en confrarías de pescadores: “[...] y resulta obligado ahora también recordar que siendo el derecho de sufragio activo de naturaleza personal la pretensión del reconocimiento del mismo o de su vulneración sólo puede ejercitarse por aquel que lo ostenta y por ello ninguna pretensión sobre reconocimiento o vulneración de derechos de terceros es admisible siendo de notar que no accionan en el presente recurso los socios o afiliados cuya exclusión del censo electoral se denuncia, por ello dicho motivo debe ser rechazado [...]”.





Deste xeito, como Miguel Ángel Delgado González non é titular de dereito de sufraxio nas eleccións celebradas nas Confrarías de Pescadores de Galicia, non cabe estimar o recurso de reposición contra a resolución da xunta electoral pola que se inadmitía o escrito presentado por falta de lexitimación activa, polo que non procede a estimación do recurso de reposición interposto contra esta resolución.

De todo o exposto, esta xunta electoral **RESOLVE**:

DESESTIMAR o recurso de reposición presentado por Miguel Ángel Delgado González, en calidade de Presidente da Plataforma en Defensa do Sector Marítimo Pesquero de Galicia contra a resolución desta xunta electoral de 08.10.2018 pola que se inadmitía o escrito presentado polo recorrente no que solicitaba a suspensión das eleccións nas Confrarías de Pescadores de Galicia.

Contra esta resolución, que pon fin á vía administrativa, o interesado poderá interpoñer recurso potestativo de reposición no prazo de un mes a contar dende o día seguinte ao da notificación ante o mesmo órgano que o ditou ou ben interpoñer directamente recurso contencioso administrativo ante a Sala do contencioso-administrativo do Tribunal Superior de Xustiza de Galicia, no prazo de dous meses a contar dende o día seguinte ao da súa notificación, de conformidade co establecido nos artigos 10 e 46 da Lei 29/1998, do 13 de xullo, reguladora da xurisdicción contencioso administrativa.”

Santiago de Compostela,

O secretario da Xunta electoral

Juan Manuel Rodríguez Rodríguez

(asinado dixitalmente)

